

Ишди сагати программаби х1ясибли, дарган мез 11 ибил классличи бикайчи делч1ахъес чебиахъуси саби, илх1елира гьалар урдалтули дуибти грамматикала бут1нира алавдуцили: фразеология, стилистика, орфоэпия, диалектология. Ишди программабани дарган мез гьаларичир т1инт1ли ва мурхъли делч1ахъес т1алаббинули саби.

Ишх1елла манзилла т1алабуни ва мурадуну х1ясибли, дарган мезла шайчир буч1антала имц1али саркъибти ва г1ячихъти бурсидешуни диэс г1яг1нити сари. Чедирти классунала цацабех1ти дурх1ни жяг1ялла студентуни сабину, илди, практикалалаш ах1енну, теориялашлар г1ях1ил х1ядурбиубтили биэс г1яг1нити саби. Илбагъандан ишди программабани мезла цацадех1 къиянти суалтачира буч1антала пикри бит1ак1ес ибси масъала т1ашбалтули саби.

Гьайгъайра, 10-11 ибти классуназир дарган мез дуч1нилис чедаахъибти сяг1ятуни камти сари (жумяг1лизиб ца сяг1ят). Вец1ъибил класслизир чедаахъибти 34 сяг1ятли лексика, фразеология, фонетика ва морфология делч1ес г1яг1нили сари, 11 ибил класслизир – синтаксис. Камли сари илди сяг1ятуни. Ил багъандан учительлис маслиг1ят бируси саби, гьалар (удирти классуназир) делч1унти темаби тикрардирули, илди сагати баянтачил чедиц1ахъни, г1ергъити дусмала г1илмула сархибдешуначи хъарихъули, дурх1нала багъудлуми т1инт1дик1ахъни.

Ишх1ели даргала г1ях1цад гьалабах1 арбякъунси ва мяг1ничертичедибдешуни сархибси художественная литература леб, сунезирра лерилра-сера жанраби ва жураби ак1ахъубси. Ил литературный мезличил белк1унси саби. Ил г1урра гьалабах1 арбукнилизиб даргала литературный мезла къадри г1урра челис-че халабик1ули саби.

Гьарли-марли чекабизурли ва бархъли, сегъунтилла гьарац1дешуни агарли, даргала литературный мезличил гьайбик1нила бурсидешуни т1алабдирули сари буч1антазирад ишди программабани. Илала дурабад, дурх1ни г1ячихъли багъес г1яг1ниси саби даргала литературный мез ак1нила история ва илди къулайдик1ахънила шайчибси г1ялимтала ва педагогунала х1янчи.

Урга даражала школа таманбирути дурх1нани литературный мезла ирнили (орфоэпияла) къяйдуртачил дарх лук1нила къяйдуртира ункъли далес г1яг1нити сари.

Дарган мез г1илмулашлар руркънила чебкад г1ергъиси замана г1ялимтани г1ях1цад х1янчи барили саби. Илди г1ялимтала имц1алим мяг1ничерти